

四庫全書

子部

欽定四庫全書

子部

藝文類聚卷三

詳校官中書臣李彤

員外郎臣牛稔文覆勘

總校官知縣臣楊懋珩

校對官中書臣李荃

謄錄監生臣王焜

欽定四庫全書

藝文類聚卷三

唐 歐陽詢 撰

歲時部上

春 夏
秋 冬

春

爾雅曰春為青陽一曰發生

尚書曰寅賓出日平秩東作日中星鳥以殷仲春

禮記月令曰孟春之月東風解凍蟄蟲始振魚上冰
獺祭魚鴻鴈來乃擇元辰天子躬耕帝藉是月也天

氣下降地氣上騰天地和同草木萌動仲春之月桃
始華倉庚鳴鷹化為鳩是月也玄鳥至之日祀于高
禩季春之月桐始華虹始見萍始生舟牧覆舟五覆
五反天子始乘舟布德行惠鳴鳩拂其羽戴勝降于
桑

周禮曰仲春詔后率外內命婦始蠶于北郊帥六宮之
夫人生種蒞之種而獻之于王

釋名曰春之為言蠢也物蠢而生

尸子曰春為忠東方為春春動也是故鳥獸孕字草木
華生萬物咸遂忠之至

尚書大傳曰東方者動方也物之動也何以謂之春春
出也物之出故謂東方春也

周官曰羅氏仲春羅春鳥獸鳩以養老也

易緯通卦驗曰震東方也主春分日出青氣出直震此
正氣出也氣出右萬物半死左蛟龍出震氣不至則歲
中少雷萬物華而不實人民疾熱應在其衡又曰立春

條風至雉雊雞乳冰解楊柳津春分明庶風至雷雨行
桃李華

毛詩曰春日載陽有鳴倉庚春日遲遲采芣苢祁祁女心
傷悲迨及公子同歸

尚書緯曰東方春龍房位其規仁好生不賊

莊子曰春氣發而百草生正得秋而萬寶成夫春與秋
豈得而然哉天道已行矣

孝經緯曰周天七衡六間曰立春後十五日斗指寅為

雨水後十五日斗指甲為驚蟄後十五日斗指卯為春分後十五日斗指乙為清明後十五日斗指辰為穀雨

論語曰暮春者春服既成冠者五六月童子六七人浴乎沂風乎舞雩詠而歸

老子曰衆人熙熙若享太牢如登春臺

淮南子曰春女悲秋士哀至物化矣又曰女夷鼓歌以

司天和以養百穀禽獸草木

女夷主春夏長養之神

又曰孟春之

月東宮御女青色衣青采鼓琴瑟

說苑曰管仲曰吾窮必矣吾不能以春風風人不能以夏雨雨人吾窮必矣

京房占曰春當退貪殘進柔良恤幼孤賑不足求隱士則萬物應節而生隨氣而長所謂春令也又曰正月建寅律為太簇雞雉孳尾招搖生聚少陽解凍其氣溫柔逆之則寒

白虎通曰嫁娶以春何也春天地交通物始生陰陽交

接之時也

臨海異物志曰鵓鵒一名田鵓春三月鳴晝夜不止音聲自呼俗言取梅子塗其口兩邊皆赤上天自言乞思至當麥自熟鳴乃止耳

漢書曰孟春之月羣居者將散行人振木鐸徇於路以采詩獻之太師比其音律以聞於天子

東觀漢記曰梁鴻將之會稽作詩曰維季春兮華色麥含金兮方秀

續漢禮儀志曰立春之日京都百官皆衣青衣立青幡
施土牛耕人于門外又曰立春之日下寬大書曰方春
東作敬始慎微罪殊死且勿案驗皆須麥秋退貪殘進
桑良

博物志曰宋國有田夫常衣麇縕以過冬暨春東作自
暴於日不知天下之有廣厦隩室縣續狐貉顧其妻曰
負日之暄人莫知者以獻吾君將有賞

楚辭曰獻歲發春兮汨吾南征葉蘋齊葉兮白芷生湛

湛江水兮上有楓目極千里兮傷春心又曰開春發兮
白日出之悠悠吾且蕩志而愉樂兮遵江夏以娛憂又
曰王孫遊兮不歸春草生兮萋萋又曰青春受謝白日
昭春氣奮發萬物遽

詩晉陸機詩曰節運同可悲莫若春氣甚和風未及燠
遺涼清且凜

晉張協雜詩曰大昊啓東節春郊禮青祗鷹化日夜分
雷動寒暑離飛澤洗冬條浮颺解春澌采虹纓高雲文

虬鳴陰池沖氣扇九垓蒼生衍四垂時至萬寶成化周
天地移

晉郭璞詩曰青陽暢和氣谷風穆以溫英莖粵林薈昆
虫咸啓門高臺臨迅流四坐列王孫羽蓋停雲陰翠鬱
映玉樽

晉顧凱之神情詩曰春水滿四澤夏雲多奇峰秋月揚
明輝冬嶺秀寒松

梁簡文帝春日想上林詩曰春風本自奇楊柳最相宜

柳葉恒著地楊花好上吹處處春心動常惜光陰移西
京董賢館南宛習都池荇間魚共樂桃上鳥相窺香車
雲母憶駛馬黃金羈又晚春時詩曰紫蘭葉初滿嬌鶯
弄不稀石躑還似獸蘿長更勝衣水凍文鯨聚山暝鴉
鳥飛渚蒲變新節巖桐長舊圍風花落未已山齋開夜
扉又春日看梅詩曰昨日看梅樹新花已自生今日聞
春鳥何啻兩三聲凍解池開綠雲穿天半晴遊心不應
動為此欲逢迎又晚日後堂詩曰慢陰通碧砌日影度

城隅岸柳垂長葉窻桃落細跗跗花留蛺蝶粉竹翳蜻蜓
珠賞心無與共染翰獨踟躕又春日詩曰花開幾千葉
木覆數重衣蝶颺縈空僂燕作同心飛歌妖弄曲罷鄭
女挾琴歸又春日詩曰年還樂應滿春歸思復生桃含
可憐紫柳發斷腸青落花隨燕入遊絲帶蝶驚邯鄲歌
管地見許欲留情

梁元帝春日詩曰春還春節美春日春風過春心日日
異春情處處多處處春芳動日日春禽變春意春已繁

春人春不見不見懷春人徒望春光新春愁春自結春
結詎能申欲道春園趣復憶春時人春人竟何在空爽
上春期獨念春花落還似昔春時

梁沈約詠春初詩曰扶道覓陽春相將共攜手草色猶
自腴林中都未有無事逐梅花空教信楊柳且復歸
去來含情寄杯酒又春咏曰楊柳亂如絲綺羅不自
持春草黃復綠客心傷此時青苔已結涓碧水復盈
淇日華照趙瑟風色動燕姬襟前萬行淚故是一相

思

梁吳筠春詩曰春從何處來拂水復驚梅雲彰青瑣闥
風吹承露臺美人隔千里羅帷閉不開無由得共語空
對相思杯

梁王僧孺寄鄉友詩曰旅心已多恨春至尚離羣翠枝
結斜影綠水散圓文戲魚兩相顧遊鳥半藏雲何時不
憫默是日寢思君又春思絕句詩曰雪罷枝即青冰開
水便綠復聞黃鳥聲全作相思曲

梁蕭子範春望古意詩曰光景斜漢宮橫梁照采虹春
情寄柳色鳥語出梅中氛氲閨裏思逶迤水上風落花
徒入戶何解妾牀空

梁王筠春日詩曰金堤草非舊玉池泉已新風生似牛
角雲上若魚鱗幽閨多怨思停織坐嬌春芳華既零落
方作向隅人

梁蕭瑀春日貽劉孝綽詩曰澗水初流碧山櫻早發紅
新禽爭弄響落盡亂從風拂筵多軟幹映戶悉花叢誰

云相去遠垂柳對高桐

梁庾肩吾詩曰桃紅柳絮白照日復隨風影出朱城外
香歸青殿中水映寄生竹山橫半死桐頌文知渥重搦
札愧才空

梁鮑泉奉和湘東王春日詩曰新燕始新歸新蝶復新
飛新花滿新樹新月麗新輝新光新氣早新望新盈抱
新水新綠浮新禽新聽好新景自新還新葉復新攀新
枝雖可結新愁詎解顏新思獨氛氲新知不可聞新扇

如新月新盃學新雲新落連珠淚新點石榴裙

梁間人倩春日詩曰高臺動春色清池映日華綠葵向
光轉翠柳逐風斜林有鳴心鳥園多奪目花相與感知
節歎子獨離家

周庾信詠春詩曰昨夜鳥聲春驚鳴動四隣今朝梅樹
下定有咏花人流星浮酒泛粟瑱繞杯唇何勞一片雨
喚作陽臺神又曰逍遙遊桂苑寂絕想桃源狹石分花
逕長橋映水門管聲驚百鳥人衣香一園定知歡未足

橫琴坐樹根

陳徐陵詩曰岸煙起暮色岼水帶斜暉逕狹橫枝度簾
搖驚燕飛落花承步履澗澗寫行衣何殊九芝蓋薄暮
洞庭歸

陳江撝山庭春詩曰洗沐唯五日棲遲在一丘古植橫
近澗危石聳前洲峯綠開河柳池紅照海榴野花寧待
晦山蟲詎識秋人生復能幾夜燭非長遊

賦晉傅玄陽春賦曰虛心定乎昏中龍星正乎春辰嘉

句芒之統時宣太皞之威神素冰解而泰液洽玄獺祭
而鴈北征幽蟄蠢動萬物樂生依依楊柳翩翩浮萍桃
之天天灼灼其榮繁華燿而曜野煒芬葩而揚英鵲營
巢於高樹燕銜泥於廣庭覩戴勝之止桑聆布穀之晨
鳴習習谷風洋洋綠泉丹霞橫嶺文虹竟天

晉湛方生懷春賦曰夫榮彫之感人猶色象之在鏡事
隨化而遷迴心無主而虛映眄秋林而情悲遊春澤而心
惡雖四時之平分何陽節之清淑日婉孌以舒和氣有

仁而無肅雷發響於南山雨漸澤於四溟啓潛蟄於九
泉收靈蛇於天庭修虹煥綠以東罔幽澗泮冰而流清
鴻飄翮於歸風燕銜泥而來征鷺鳥感仁而草性鷓鴣
乘化而變聲麥芄芄而含秀桑鵲鵲而敷榮

周庾信春賦曰宜春苑中春已歸披香殿裏作春衣新
年鳥聲千種囀二月楊花滿路飛河陽一縣併是花金
谷從來滿園樹一叢香草足礙人數尺遊絲卽橫路苔
始綠而藏魚麥纔青而覆雉吹簫弄玉之臺鳴珮凌波

之水移戚里之家富入新豐而酒美石榴聊泛蒲桃醅
醅芙蓉玉盃蓮子金杯新芽竹笋細核楊梅綠珠捧琴
至文君送酒來玉管初調鳴絃暫撫陽春淥水之曲對
鳳迴鸞之舞更炙笙簧還移箏柱月入歌扇花承節鼓
協律都尉射雉中郎停車小苑連騎長楊金鞍始被拓
弓新張拂塵看馬埒分朋入射堂馬是天池之龍種帶
乃荆山之玉梁艷錦安天鹿新綾織鳳皇三日曲水向
河津日晚河邊多解神樹下流杯客沙頭度水人鏤薄

窄衫袖穿珠帖領巾百丈山頭日欲斜三晡未醉莫還
家池中水影懸勝鏡屋裏衣香不如花

晉夏侯湛春可樂曰春可樂兮樂東作之良時嘉新田
之啓萊悅中疇之發苗桑冉冉以奮條麥遂遂以揚秀
澤苗翳渚原卉耀阜春可樂兮樂崇陸之可娛登夷岡
以迴眺超矯駕乎山隅綴雜華以為蓋集繁蕤以飾裳
散風衣之馥氣納戢懷之潛芳鸚交交以弄音翠翹翹
以輕翔招君子以偕樂攜淑人以微行

晉王廙春可樂曰春可樂兮樂孟春之初陽冰泮渙以
微流土冒橛而解剛野暄卉以揮綠山葱蒨以發蒼

晉李顯悲四時曰悲春日兮悲陽澤之方宣建靈威以
延蟄叩東震而響天布和氣之烟煴舒朗景之淑鮮雲
興滋於秀石颺鳴柯於崇山平臯眇莽中林葱青野馬
飛澗晨虹垂旌陽燕南徂陰鴈北征素華浩浩丹秀熒
熒

夏

爾雅曰夏為朱明一曰長羸

尸子曰夏為樂南方為夏夏興也南任也是故萬物莫不任興蕃殖充盈樂之至也

尚書曰申命羲叔宅南交日永星火以正仲夏鳥獸希
草

周書時訓曰夏至之日鹿角解蜩始鳴大暑之日腐草
化為螢

禮記曰孟夏月盛德在火天子迎夏於南郊還反行賞

封諸侯慶賜遂行靡草死麥秋至斷薄刑決小罪仲夏之月天子羞以含桃先薦寢廟日長至陰陽爭君子處必掩身無躁蟬始鳴木槿榮可以居高明可以遠眺望可以升山陵可以處臺榭季夏之月溫風始至蟋蟀居壁廡乃學習腐草化為螢又曰南方者夏夏之為言假也養之長之假之仁也

尚書考靈曜曰火星為夏期專陽相同精感符

易通卦驗曰離南方也主夏日中赤氣出直離此正氣

出右萬物半死氣出左赤地千里

詩含神霧曰曹地處季夏之位土地動急音中徵其聲
清以急

太公金匱曰紂嘗以六月獵於西土發民逐禽民諫曰
今六月天務覆施地務長養今盛夏發民逐禽而元元
懸於野君踐一日之苗而民百日不食天子失道後必
無福紂以為妖言而誅之後數月天暴風雨發屋折樹
皇覽逸禮曰夏則衣赤衣佩赤玉乘赤輅駕赤龍載赤

旗以迎夏於南郊其祭先黍與雞居明堂正廟啓南戶
孝經緯周天七衡六間曰穀雨後十五日斗指戊東南
維為立夏後十五日斗指己以為小滿

管子曰夏至而麥熟天子祀太宗其盛以麥穀之始也
淮南子曰孟夏之月南宮御女赤色赤衣吹竽笙又曰
鄒衍事燕惠王盡忠左右諧之王繫之仰天而哭夏五
月為之下霜又陽氣為火陰氣為水水勝故夏至溫火
勝故夏至燥八尺之表景修尺五寸景修則陰氣勝短

則陽氣勝陰氣勝則為水陽氣勝則為旱

文子曰政失於夏熒惑逆行夏政不失降雨時

續漢書律歷志曰日行南陸謂之夏

蔡邕獨斷曰夏至陰氣始起麋鹿解角故寢兵鼓身欲
寧志欲靜故不聽事

續漢禮儀志曰夏至日浚井改水冬至日鑽燧改火

五經通義曰夏至陰始動未達故寢兵鼓不設政事所
以助陰氣也易曰先王以至日閉關后不省方以此助

之

楚辭曰滔滔孟夏草木莽莽又曰收恢台之孟夏

詩晉郭璞詩曰羲和騁丹衡朱明赫其猛融風拂晨霄
陽精一何罔閒宇靜無娛端坐愁日永

晉李顯詩曰炎光燦南溟溽暑融三夏黶霽重雲陰
砭稜震靄吒

宋顏延之夏夜呈從兄散騎詩曰炎天方埃鬱暑景
塵紛獨靜闕隅座臨堂對星分側聽風薄木遙睇月開

雲夜蟬當夏急陰出先秋聞歲候初過半荃蕙豈久芬
齊謝朓出下館詩曰麥候始清和涼雨銷炎燠紅蓮搖
弱行丹藤繞新竹物色盈懷抱方駕娛耳目

梁蕭子範夏夜獨坐詩曰節序值徂炎茲宵在三伏馮
軒佇涼氣中庭倦煩燠寂寞對空窻清疎臨夜竹虫音
亂階草螢光繞庭木簾月度斜暉風花起餘馥一傷年
志罷長嗟逝波速

賦晉傅玄述夏賦曰四月惟夏運臻正陽和氣穆而扇

物麥含露而飛芒清微泛於琴瑟朱鳥感於炎荒鹿解
角於中野草木蔚其條長

梁江淹四時賦曰至炎雲峯起芳樹未移臯蘭生坂朱
荷出池憶上國之綺樹想金陵之蕙枝

晉李顯悲四時賦曰悲炎節之赫曦覽祝融之御轡遊
井耀兮南離晞辰凱之長吹蔭綠柳之揚枝雲鬱律以
泉涌雨淋漓而方從奮駭霆之奔磕舒驚電之橫搞

秋

爾雅曰秋為白藏一曰收成

禮記曰孟秋之月涼風至白露降寒蟬鳴鷹乃祭鳥仲
秋之月鴻雁來玄鳥歸羣鳥養羞季秋之月鴻雁來賓
雀入大水為蛤菊有黃華豺乃祭獸

尸子曰秋為禮西方為秋秋肅也萬物莫不禮肅敬之
至也

毛詩曰秋日淒淒百卉具腓又曰一日不見如三秋兮
春秋考異郵曰立秋趣織鳴

尚書曰分命和仲宅西曰昧谷寅餞納日平秩西成宵
中星虛以殷仲秋

周書時訓曰立秋之日涼風至後五日白露降後五日
寒蜩鳴涼風不至國無嚴政白露不降民多疾病寒蜩
不鳴人臣力爭白露之日鴻雁來後五日玄鳥歸後五
日羣鳥養羞鴻雁不來遠人背叛玄鳥不歸室家離散
羣鳥不羞臣下驕慢秋分之日雷乃始收後五日蟄虫
坯戶後五日水始涸雷乃不收諸侯淫泆蟄虫不坯民

靡有賴水不始涸介虫為害

周官曰司裘掌為太裘以供王祀天之服仲秋獻良裘
季秋獻功裘又曰籥章掌仲秋擊土鼓鬸豳詩以迎寒
皇覽逸禮曰秋則衣白衣佩白玉乘白輅駕白駱載白
旗以迎秋於西郊

詩含神霧曰秦地處仲秋之位男懦弱女高腴白色秀
身音中商其言舌舉而仰聲清以揚

文子曰日月欲明浮雲蓋之叢蘭欲茂秋風敗之

淮南子曰孟秋之月西宮御女白色衣白采撞白鐘其
兵鉞其畜狗八月官尉其樹柘九月官候其樹槐

漢書曰孫實為京兆尹以立秋日署侯文為東部督郵
入見敕曰今鷹隼始擊當從天氣取姦惡以成嚴霜之
誅掾部其有人乎

尚書考靈曜曰虛星為秋候昴為冬期陰氣相佐德乃

不邪子助母收母合子符

虛星北方宿也昴星
西方宿也陰稱母也

續漢禮儀志曰立秋之日白郊畢始揚武斬牲於郊東

門以薦陵廟其儀乘輿御戎輅白馬朱鬣騁執弩射牲
牡以鹿麋太宰令謁者各一人載獲車馳駟送陵廟還
宮遣使者齎束帛以賜武官肆兵習戰陣之儀斬牲之
禮名曰殽劉

世說曰張季鷹辟齊王東曹掾在洛見秋風起因思吳
蓴菜羹鱸魚膾曰人生貴適志耳何能從宦數千里以
要名爵遂命駕便歸俄而齊王敗時人皆謂之為見幾
而作

楚辭曰秋風兮蕭蕭舒芳兮振條又曰悲哉秋之為氣
也蕭瑟兮草木搖落而變衰憫慄兮若在遠行登山臨
水兮送將歸沈寥兮天高而氣清寂慘兮收潦而水清
又曰嫋嫋兮秋風洞庭波兮木葉下又曰皇天平分四
時兮竊獨悲此凜秋白露既降下百草兮淹離披此梧
楸又曰秋既先戒之以白露冬又申之以嚴霜

風土記曰鳴鶴戒露白鶴也此鳥性儆至八月白露降
即高鳴相儆

詩晉左思雜詩曰秋風何烈烈白露為朝霜柔條旦夕
勁綠葉日夜黃明月出雲崖皎皎流素光披軒臨前庭
嗷嗷晨雁翔

晉孫綽詩曰蕭瑟仲秋月飈唳風雲高山居感時變遠
客興長謠疎林積涼風虛岫結凝霄湛露灑庭林密葉
辭榮條撫葉悲先落攀松羨後凋

晉江逋詩曰祝融解炎轡尋收起涼駕高風催節變凝
露督物化長林悲素秋茂草思朱夏鳴雁薄雲嶺蟋蟀

吟深榭寒蟬向夕號驚飈激中夜

宋孝武初秋詩曰夏晝炎氣微火息涼風生綠草未傾
色白露已盈庭遠視秋雲發近聽寒蟬鳴運移吟物化
川上感余情又秋夜詩曰局景薄西隅升月照東垂肅
肅風盈幙泣泣露傾枝側聞飛壺急坐見河宿移觀辰
念節變感物矜乖離

宋謝惠連懷秋詩曰平生無志意少小嬰憂患如何乘
苦心矧復值秋晏皎皎天月明奕奕河宿爛蕭瑟含風

蟬寥啖度雲雁寒商動清閨孤燈暖幽慢耿介繁慮積
展轉長宵半夷險難豫謀倚伏昧前筭未知古人心且
從性所玩賓至可命觴朋來當染翰顏魄不再圓傾義
無兩旦金石終銷毀丹青暫彫換各勉玄髮歡無貽白
首歎

宋南平王劉鑠歌詩曰昊天清且高秋氣發初涼白露
下微津明月流素光凝烟泛城闕淒風入軒房朱華先
零落綠草就黃黃纖羅還篋笥輕紉改衣裳

宋鮑照秋日詩曰枯枝葉易零疲客心易驚今茲亦何
早已聞絡緯鳴迴風滅且起卷蓬息復征悽悽簟上寒
慄慄帳裏清物色延暮思霜露逼朝榮白楊方蕭瑟長
歎從此生

宋湯惠休歌詩曰秋風嫋嫋入曲房羅帳含月思心傷
蟋蟀夜鳴斷人腸長夜思君心飛揚他人相思君相忘
錦衾瑤席為誰芳又歌思引曰秋寒依依風過河白露
蕭蕭洞庭波思君末光光已滅眇眇悲望如思何

梁簡文帝秋詩曰羽翼晨猶動珠汗晝恒揮秋風忽嫋
嫋向夕引涼歸浮陰即染浪清氣始乘衣卷幌通河色
開窻引月暉晚花闌下照疎螢簾上飛直置猶如此何
況送將歸又秋夜詩曰高秋度函谷墜露下芳枝綠潭
倒雲氣青山銜月規花心風上轉葉影樹中危外遊獨
千里夕歎誰共知又秋夜詩曰螢飛夜的的虫思夕嚶
嚶輕露沾懸井浮烟入綺寮檐重月沒早樹密風聲饒
池蓮翻罷葉霜篠生寒條端坐彌茲漏離憂積此宵又

秋晚詩曰浮雲出東嶺落日下西江促陰橫隱壁長暉
斜度窓亂霞圓綠水細葉影飛缸

梁蕭譽奉和詩曰副君乘夏景臨秋坐北宮杏梁照初
月蓮池引夕風清暉同藻井流香入綺籠鵲聲時徙樹
螢光乍滅空涼氛散簟席露色變林叢

梁范雲贈俊公道人詩曰秋蓬飄秋甸寒藻泛寒池風
條振風響霜葉斷霜枝幸及清光滿無使明月虧月虧
君不來相期竟悠哉

梁沈約秋夜詩曰月落宵向分紫烟鬱氛氲曉螢入
霧離離雁出雲巴童閣理瑟漢女夜縫裙新知樂如是
久要詎相聞

梁庾肩吾奉和便省餘秋詩曰前對金精坂傍臨圓水
池照影礙浮葉看山通迴枝雁行連霧盡雨足帶雲移
梁吳筠秋念詩曰團團珠暉轉炤炤漢陰移箕風入桂
露壁月滿瑤池樹青草未落蟬涼葉已危還深長夜想
顧憶臨卽卮芳杜果蕪沒纓帶欲何為

梁鮑泉秋日詩曰露色已成霜梧楸欲半黃燕去櫚恒
靜蓮寒池不香夕鳥飛向月餘蚊聚逐光旅情恒自苦
秋夜漸應長

賦晉潘岳秋興賦序曰晉十有四年余春秋三十有二
始見二毛以太尉掾寓直于散騎之省高閣連雲陽景
罕曜珥蟬冕而襲紃綺之士此焉遊處僕野人也偃息
不過節屋茂林之下談話不過農夫田父之客攝官承
乏猥厠朝列夙興晏寢匪遑底寧譬猶池魚籠鳥而有

江湖山藪之思於是染翰操紙慨然而賦于時秋也故
以秋興命篇其辭曰四運忽其代序兮萬物紛以迴薄
覽華時之時育兮察盛衰之所託感冬索以春敷嗟夏
茂而秋落雖末事之榮悴兮伊人情之美惡嗟秋日之
可哀兮諒無愁而不盡野有歸燕隰有翔隼遊氛朝興
槁葉夕殞於是乃屏輕箴釋纖絺藉莞御袷衣庭樹
槭以灑落勁風戾而吹帷蟬嘒嘒以寒吟鴈飄飄而南
飛天是朗而彌高日悠揚而浸微何微陽之短晷覺涼

夜之方永月朧朧以含光露淒淒以凝冷熠燿粲於階
闥兮蟋蟀鳴於軒屏聽離鴻之晨吟望流火之餘景宵
耿介而不寐兮獨展轉於華省悟歲時之遒盡兮慨俛
首而自省班鬢髮以承弁兮素髮颺以垂領且斂衽以
歸來兮忽投紱以高厲耕東臯之沃壤兮輸黍稷之餘
稅逍遙乎山川之阿放曠乎人間之世優哉游哉聊以
卒歲

晉盧諶感運賦曰朱明送夏白藏迎秋微涼漸屆溽暑

日收氣歟歟而浸冷霜微微而日華翠葉紛以朝落朱
花慘以夕捐

晉江逌述歸賦曰時運逝其何速素秋奄以告季虛柳
中於昏日羲和宿于房位微霜淒其薄入凝露粲其朝
墜林飄飄以灑葉隤芒芒而摧穠菊發華於高丘鴈辭
北以南莅

宋袁淑秋晴賦曰是月也聲暑合朝夜分霆收耀虹戢
文炎都褰埃旻寓滌氛曳悲泉之凝霧轉絕垠之嚴雲

宋沈勃秋羈賦曰於時朱雲弛辰金祗御歲菊圖縟於園沼橘倒飾於池例草改貌而傾蕢林伐狀而搖蒂潭歟氣而威荷露危光而嚴蕙

梁簡文帝秋興賦曰秋何興而不盡興何秋而不傷傷二情之本背更同來而匪方復有登山望別臨水送歸洞庭之葉初下塞外之草前衰攸征人與行子必承臉而沾衣紛吾閒居有怡優游多暇乃息書幌之勞以命北園之駕爾乃從玩池曲遷坐林間淹留而蔭丹岫徘徊

徘徊攀木蘭為興未已升彼懸崖臨風長想馮高俯窺
察游魚之息澗憐驚禽之換枝聽夜籤之響殿聞懸魚
之扣扉將據梧於芳杜欲留連而不歸又臨秋賦曰火
歇兮秋氣生風起兮秋潦清覽時興而自得聊飛轡而
娛情遵二條之廣路背九仞之高城爾乃登長坂息余
驥攬筆抒情沈吟屬思草色雜而香同樹影齊而花異
遙峯迢遞縈沙斷絕雲出山而相似水含天而難別

梁江淹四時賦曰及夫秋風一至白露團團明月生波

螢光迎寒眷庭中之梧楸念機上之羅紉

晉夏侯湛秋可哀曰秋可哀兮哀秋日之蕭條火迴景
以西流天既清而氣高壤含素霜山結玄霄月延路以
增夜日遷行以收暉屏締綌於篋笥納綸縞以授衣秋
可哀兮哀新物之陳蕪綢篠朔以歛稀密葉撼以隕疎
雁擢翼於太清燕蟠形乎榛墟秋可哀兮哀良夜之遙
長月翳翳以隱雲時籠籠以投光映前軒之疎幌焰後
帷之閒房拊輕衾而不寐臨虛檻而褰裳感時邁以興

思情愴愴以含傷又秋夕哀曰秋夕兮遙長哀心兮永
傷結帷兮中宇展履兮閒房聽蟋蟀之潛鳴覩鴻雁之
雲翔尋修廡之飛檐覽明月之流光木蕭蕭以被風階
縞縞以受霜玉機兮環轉四運兮驟遷銜恤兮迄今忽
將兮涉年日往兮哀深歲暮兮思繁

晉湛方生秋夜賦曰悲九秋之為節物凋悴而無榮嶺
頽鮮而殞綠木傾柯而落英履代謝以惆悵覩搖落而
興情信臯壤而感人樂未畢而哀生秋夜清兮何秋夕

之轉長夜悠悠而難極月皎皎而停光播商氣以清溫
扇高風以草涼水激波以成連露凝結而為霜凡有生
而必凋情何感而不傷苟靈符之未虛孰茲戀之可忘
何天懸之難釋思假暢之冥方拂塵襟於玄風散近滯
於老莊攬逍遙之宏維總齊物之大綱同天地於一指
等太山於毫芒萬慮一時頓泯情累豁焉都忘物我泯
然而同體豈復壽夭於彭殤

宋謝琨秋夜長曰秋夜長兮雖欣長而悼速送晨暉於

西嶺迎夕景於東谷夜既分而氣高風入林而傷綠燕
翩翩以辭宇雁邕邕而南屬

宋蘓彥秋夜長曰晨暉電流以西逝閒宵漫漫其未央
牛女隔河以延停列宿雙景以相望輕雲飄霏以籠朗
素月披曜而舒光時禽鳴於庭柳節虫吟於戶堂零葉
紛其交萃落英颺以散芳覩遷化之道邁悲榮枯之靡
常貞松隆冬以擢秀金菊吐翹以凌霜

宋何瑾悲秋夜曰欣莫欣兮春日悲莫悲兮秋夜伊秋

夜之可悲增沉懷於遠情歎授衣於幽詩感蕭瑟於宋
生天寥廓兮高寒氣淒肅兮厲清燕泝陰兮歸飛雁懷
陽兮寒鳴霜凝條兮漼漼露雷葉兮泠泠

宋伏系之秋懷曰夫景宇肅澄風高木歛淒氣夕哀零
露晨湛澤收潤而草枯葉驟墜而庭掩雁偕來以希陽
燕遊逝而投險豈微物之足懷傷頽齡之告漸

冬

爾雅曰冬為玄冥一曰安寧

禮記曰孟冬之月水始冰地始凍雉入大水為蜃虹藏
不見仲冬之月水益壯地始坼鵲始鳴虎始交荔挺
出丘蚓結麋角解日短至季冬之月雁北向鵲始巢雉
雊雞乳日窮于次月窮於紀星迴于天

尚書大傳曰北方者物之伏方也何以謂之冬冬中也
物方藏於中也故曰北方冬也

尚書曰申命和叔宅朔方曰幽都平在朔易日短星昴
以正仲冬

周書時訓曰小寒之日雁北鄉又五日鵲始巢又五日雉始雊雁不北鄉民不懷生鵲不始巢國不安寧雉不始雊國乃大水大寒之日雞始乳又五日鷩鳥厲疾又五日水澤腹堅雞不乳淫女亂男鷩鳥不厲國不除兵水澤不腹堅言乃不從

逸禮曰冬則衣黑衣佩玄玉乘玄輅駕鐵驪載玄旂以迎冬于北郊其祭先豕居明堂後廟啓北戶

毛詩曰冬日烈烈飄風發發

易緯通卦驗曰冬至之日見雲送迎從下鄉來歲美民
人和不疾疫無雲送迎德薄歲惡故其雲赤者旱黑者
水白者為兵黃者有土功諸從日氣送迎此其徵也又
曰立冬不周風至水始冰薺麥生燕雀入水為蛤

太公金匱曰夏桀之時以十月發民鑿山穿陵通於河
民諫曰孟冬鑿山穿陵是泄天氣發地之藏天子失道
後必有敗桀殺之暮年岑山崩為大澤湯率諸侯伐之
京房占曰春冬乾王不周風用事人君當興邊兵治城

郭行刑斷獄訟繕官殿

漢書曰冬民既入婦人同巷相從夜績一月得四十五日必相從者所以省費燎火同巧拙而合習俗也

魏畧曰董遇好學人從學者遇不肯教云當先讀書百遍而義自見從學者云苦渴無日遇曰當以三餘冬者歲之餘雨者晴之餘夜者日之餘

五經通義曰冬至陽氣萌陰陽交精始成萬物氣微在下不可動泄

金史四庫全書 卷三
桓譚新論曰太原郡民以隆冬不火食五日雖有病緩
急猶不敢犯為介子推故也

續漢禮儀志曰立冬之日夜漏未盡五刻京都百官皆
衣皂迎氣北郊

詩晉張華冬初歲小會詩曰日月不留四氣迴周節慶
代序萬國同休庶尹羣后奉壽升朝我有嘉禮式宴百
寮又雜詩曰晷度隨天運四時互相承東壁正昏中固
陰寒節升繁霜降當夕悲風中夜興朱火青無光蘭膏

坐自疑重衾無煖氣挾纊如懷冰伏枕終遙昔寤言莫
予應永思慮崇替慨然獨撫膺

晉陳新塗妻李氏冬至詩曰靈象尋數迴四氣平運散
陰律鼓微陽大明啓修旦感與時來興心隨逝化歎式
宴集中堂賓客盈朝館

晉曹毗詠冬詩曰縣邈冬夕永凜厲寒氣升離葉向晨
落長風振條興夜靜輕響起天清月暉澄寒水盈渠結
素霜竟擱凝今載忽已暮來紀奄復仍

宋謝靈運歲暮詩曰殷憂不能寐苦此夜難頽明月照
積雪朔風勁且哀運往無淹物逝年覺易催又彭城官
中直感歲暮詩曰草草眷徂物契契矜歲殫楚艷起行
戚吳趨絕歸懽修帶緩舊裳素鬢改朱顏晚暮非獨已
鳴鵾歇春蘭

宋鮑照冬至詩曰景移風度改日至晷迴換眇眇負霜
鶴皎皎帶雲雁長河結澗玕層冰如玉岸又冬日詩曰
嚴風亂山起白日欲還次重霧蔽窮天夕陰晦寒地瀚

海有歸潮哀容不還穉令君且安歌無念老將至

謝靈運詠冬詩曰七宿乘運曜三星與時滅履霜冰彌
堅積寒風愈切繁雲起重陰迴颺流輕雪園林粲斐皓
庭除秀皎潔墀瑣有凝汙達衢無通轍

梁簡文帝大同十年十月戊寅詩曰喧塵是時息靜坐
對重巒冬深柳條落雪後桂枝殘星明霧色盡天白雁
行單雲飛乍想閣冰結遠疑紉晚橘隱重屏枯藤帶迴
竿荻陰連水氣山峯染月寒又玄圃寒夕詩曰洞門扉

未掩金壺漏已催
曛烟生澗曲暗色起林隈
雪花無有蒂水鏡不安臺
堦楊始倒挿浦桂半新栽
陳根委落蕙細蘂發香梅
雁去銜蘆上猿戲繞枝來
又大同十一月庚戌詩曰
茲園植藝積山谷久紆威
直興轉多緒真事亦因依
是節嚴冬暮寒雲掩落暉
遠聞風瑟瑟亂視雪霏霏
浪起川難渡林深人至稀
山禽背逕走野鳥歷塘飛

梁庾肩吾歲盡詩曰歲序已云殫
春心不自安聊開栢

葉酒試奠五辛盤金薄圖神燕朱泥印鬼丸梅花應可
折倩為雪中看

北齊邢子才冬日傷志詩曰昔時情遊士任性少矜裁
朝馳馬腦勒夕銜熊耳杯折花贈淇水撫瑟望叢臺繁
華夙昔改哀病一時來重以三冬月愁雲聚復開天高
日色淺林勁鳥鳴哀終風激簷宇餘雪滿條枚遨遊昔
宛洛踟躕今草萊時事方去矣撫已獨懷哉

周王褒和殷廷尉歲暮詩曰歲晚悲窮律他鄉念索居

寂寞灰心盡摧殘生意餘產空交道絕財殫密親疎空
悲趙壹賦還著虞卿書

賦晉陸機感時賦曰悲夫冬之為氣亦何惜慄以蕭索
天悠悠其彌高霧鬱鬱而四幕夜繇邈其難終日晚晚
而易落伊夫時之方慘曷萬物之能歡猿長嘯於林杪
鳥高鳴於雲端矧余情之含瘁恒覩物而增酸歷四時
以迭感悲此歲之已寒撫傷懷以嗚咽望永路而汎瀾
梁江淹四時賦曰至於冬陰北邊永夜不曉平蕪際海

千里飛鳥何嘗不夢帝城之阡陌故鄉之臺沼

晉陸雲歲暮賦曰顓頊御時立冥統官淪重陽於潛戶
兮嚴積陰於司寒堅冰涸於川底兮白雪墮於雲端時
凜戾其可悲兮氣蕭索以傷心悽風愴其鳴條落葉翻
而灑林獸藏丘而絕迹兮鳥攀木而棲音山振枯於層
嶺兮人懷慘於重襟

梁蕭子雲歲暮直廬賦曰日躔女度歲華云暮衡輕炭
燥權重泉涸藏立武於大陰蟄騰虵於高霧日臨圭而

易落晷中杙而南嶺凝寒氣於廣庭洞層陰於端庫風
餐切而晚作雲滄浪而晦景霰的皪於彤庭霏葳蕤於
丹屏韜罽罽之飛棟沒屠蘇之高影始飄舞於圓池終
停華於方井

晉傅玄大寒賦曰五行脩而竟驚兮四節紛而電逝諒
暑往兮寒來十二月而成歲日月會於析木兮重陰淒而
增肅彩虹藏於虛廓兮鱗介潛而長伏若乃天地凜冽
庶極氣否嚴霜夜結悲風晝起飛雪山積蕭條萬里百

川咽而不流兮冰凍合於四海扶木憔悴於湯谷若華
零落於濛汜



藝文類聚卷三

欽定四庫全書

子部

藝文類聚卷四

詳校官中書臣李彤

員外郎臣牛稔文覆勘

總校官知縣臣楊懋珩

校對官中書臣李荃

膳錄監生臣王焜

欽定四庫全書

藝文類聚卷四

唐 歐陽詢 撰

歲時部中

元正月晦

人日
寒食

正月十五日
三月三日

五月五日
七月十五日

七月七日
九月九日

元正

尚書曰月正元日舜格于文祖

列子曰邯鄲之民以正月之旦獻鳩於簡子簡子大悅
厚賞之客問其故簡子曰正旦放生示有恩也

孔叢子曰邯鄲民以正月旦獻爵於趙王而綴以五采王大悅

東觀漢記曰戴憑為侍中正旦朝賀帝令羣臣說經義

不通者奪其席憑遂重五十餘席

事具講論篇

漢書曰鮑宣字子都哀帝時正旦日蝕宣上書諫曰陛下父事天母事地子養黎民父虧明母震動子訛言今日蝕三陽始小民正月朔旦尚惡敗器物況日虧缺乎

漢雜事曰正月朝賀三公奉璧上殿嚮御座北面太常使贊曰皇帝為君興三公伏皇帝坐乃前進璧典略曰明帝使博士馬均作司南車水轉百戲正月朝造巨獸魚龍曼延弄馬倒騎備如漢西京故事

魏畧曰正始元年商風大起數十日發屋折樹動太極殿東閣正旦大會又甚傾床案曹休將誅之徵也

王渾集曰詔問明正旦會四方計吏入見臨朝當何所宜渾奏舊正會計吏軒下中書令宣詔問方土所宜士

人賢才隱伏未達風俗好尚禮教之宜勤農務本以盡
墾殖之利刑獄清理無枉濫之失郡守長吏勤心治政
為民興利除害訓化之績授以紙筆意陳聞見以明聖
旨垂心四遠

晉咸康起居注曰十二月庚子詔曰正會日百僚增祿
賜醪酒人二升

世說曰元帝正會引丞相王導登御牀王公固辭中宗
引之彌苦文獻曰使太陽與萬物同暉臣下何以仰瞻

帝乃止

鄧德明南康記曰昔有盧耽仕州為治中少學仙術善解飛騰每夕輒凌虛歸家曉則還州嘗元會至晚不及朝列化為白鵠至閣前徊翔欲下威儀以帚擲之得一隻履耽驚還就列內外左右莫不駭異時步騭為廣州刺史意甚惡之便以狀列聞遂至誅滅

裴玄新語曰正朝縣官殺羊懸其頭於門又磔雞以副之俗說以厭癘氣玄以問河南伏君伏君曰是土

氣上升草木萌動羊齧百草雞啄五穀故殺之以助生氣

詩魏陳王曹植元會詩曰初歲元祚吉日惟良乃為嘉會宴此高堂衣裳鮮潔黼黻玄黃珍膳雜遫充溢圓方俯視文軒仰瞻華梁願保茲善千載為常歡笑盡娛樂哉未央皇室榮貴壽考無疆

晉荀勗正大會行禮歌詩曰於皇元首羣生資始履端大享敬御福祉肆覲羣后爰及卿士欽順時財允也天

子又曰明明天子臨下有赫四表宅心惠浹荒貊桑遠
能邇孔淑不逆來格祁祁邦家是若又曰光光邦家天
篤其祜丕顯詰命顧予三祖世德作求奄有九土思我
皇度彝倫攸序

晉曹毗正朝詩曰靈春散初澤焚煇青陽舒佳袍忽已
故今載奄復初軟節暢宇宙和風被八區

晉劉和妻王氏正朝詩曰稔冉冥機運迅矣四節經太
簇應玄律青陽兆初正

晉傅克妻辛氏元正詩曰元正啓令節嘉慶肇自茲咸
奏萬年觴小大同悅熙

晉荀勗正會公王上壽酒歌曰踐元辰延顯融獻羽觴
祈令終我皇壽而隆我皇茂而嵩本枝奮百世休祚鍾
聖躬

賦晉傅玄朝會賦曰考夏后之遺訓綜殷周之典制採
秦漢之舊儀肇元正之嘉會於是先期戒事衆發允敕
萬國咸享各以其職翼翼京邑巍巍紫極前三朝之夜

中庭燎晃以舒光華燈若乎火樹熾百枝之煌煌俯而
察之如元燭龍而炤玄方仰而觀焉若披丹霞而鑒九
陽

頌晉劉臻妻正旦獻椒花頌曰遊穹周迴三朝肇建青
陽散暉澄景載煥美哉靈葩爰采爰獻聖容映之永壽
於萬

人日

荆楚歲時記曰正月七日為人日以七種菜為羹剪綵

爲人或縷金薄帖屏風上亦戴之像人入新年形容改
新

董勛問禮俗曰一日爲雞二日爲狗三日爲猪四日爲
羊五日爲牛六日爲馬七日爲人

賈克典戒曰人日造華勝相遺像瑞圖金勝之形又像
西王母戴勝也

劉臻妻陳氏進見儀曰正月七日上人勝於人

詩隋楊休之人日登高侍宴詩曰廣殿麗年輝上林起

春色風生拂雕輦雲迴浮綺翼

薛道衡人日思歸詩曰入春纔七日離家已二年人歸落雁後思發在花前

銘李克登安仁峯銘曰正月七日厥日惟人策我良駟陟彼安仁

正月十五日

玉燭寶典曰正月十五日作膏以祠門戶

荆楚歲時記曰風俗望日以楊枝插門隨楊枝所指而

祭其夕迎紫姑神以卜

史記曰漢家以望日祀太一從昏時到明今夜遊觀燈
是其遺迹

西域記曰摩竭陀國正月十五日僧俗雲集觀佛舍利
放光雨花

涅槃經曰如來闍維訖收舍利罌置金床上天人散花
奏樂繞城步步燃燈十二里

詩蘼味道望日夜遊詩曰火樹銀花合星橋鐵鎖開暗

塵隨馬去明月逐人來遊妓皆穠李行歌盡落梅金吾
不禁夜玉漏莫相催

崔掖夜遊詩曰玉漏銅壺且莫催鐵闌金鎖徹明開誰
家見月能閒坐何處聞燈不看來又曰神燈佛火百輪
張刻像圖形七寶裝影裏如聞金口說空中似散玉毫
光又曰金勒銀鞍控紫騮玉輪朱幘駕青牛驂驪始散
東城陌倏忽還逢南陌頭

月晦

荆楚歲時記曰元日至月晦並為酺聚飲食每月皆有
晦朔正月初年時俗重以為節

玉燭寶典曰元日至月晦人並為酺食士女悉湔裳斟
酒於水湄以為度厄

帝王世紀曰堯有草夾階而生每月朔生一莢月半則
生十五莢自十六日一莢落至月晦而盡月小則餘一
莢厭而不落以為瑞草名為蓂莢一名歷莢

詩太宗皇帝月晦詩曰晦魄移中律凝暄起麗城罩雲

朝蓋上穿露曉珠呈笑樹花分色啼枝鳥合聲披襟歡
眺望極目暢春晴

北齊魏收晦日汎舟應詔詩曰裊裊春枝弱闕闕新鳥
呼棹唱忽逶迤菱歌時顧慕睿賞芳日色宴言忘日暮
游豫慰人心照臨康國步

後魏盧元明晦日汎舟應詔詩曰輕灰吹上管落棠飄
下蒂遲遲春色華晚晚年光麗

寒食

周禮曰司烜氏仲春以木鐸修火禁于國中為季春將出火也

荆楚歲時記曰去冬至一百五日即有疾風甚雨謂之寒食

周斐先賢傳曰太原舊俗云介子推焚骸一月寒食莫敢煙爨

陸翽鄴中記曰并州俗冬至後百五日為介子推斷火冷食三日作乾粥今之糗是也又曰寒食三日作醴酪

煮粳米及麥為酪擣杏仁煮作粥

范曄後漢書曰周舉遷并州刺史太原一郡舊俗以介子推焚骸有龍忌之禁至其月咸言神靈不樂舉火舉移書於子推廟曰春中寒食一月老小不堪今則三日而已

古今藝術圖曰北方山戎寒食日用鞦韆為戲以習輕趨者

詩李崇嗣寒食詩曰普天皆滅焰匝地盡藏烟不知何

處火來就客心燃

宋之問途中寒食詩曰馬上逢寒食途中屬暮春可憐
江浦望不見洛橋人

沈佺期嶺表寒食詩曰嶺外逢寒食春來不見錫洛中
新甲子明日是清明

令魏武帝明罰令曰聞太原上黨西河雁門冬至後百
五日皆絕火寒食云為介子推且北方沍寒之地老少
羸弱將有不堪之患令到人不得寒食若犯者家長半

歲刑主吏百日刑令長奪一月俸

三月三日

應劭風俗通曰按周禮女巫掌歲時以祓除疾病禳者
潔也故於水上盥潔之也已者祉也邪疾已去祈介祉
也

韓詩曰三月桃花水之時鄭國之俗三月上巳於溱洧
兩水之上執蘭招魂續魄拂除不祥

漢書曰太后春幸蠶館率皇后列侯夫人桑遵灞水而

祓除

續漢書禮儀志曰三月上巳官民皆潔於東流水上自洗濯祓除宿垢為太潔

魏志曰袁紹三月上巳大會賓徒於薄落津聞魏郡兵及黑山賊于毒等數萬人共覆鄴城殺守坐中客家在鄴者皆憂怖失色或起而立紹容貌自若不改常度

竹林七賢論曰王濟嘗解褌浴水明日或問王曰昨遊有何語議濟曰張華善說史漢裴逸民叙前言往行袁

哀可聽

事具談
論部

夏仲御別傳曰仲御詣洛到三月三日洛中公王以下
莫不方軌連軫竝至南浮橋邊襍男則朱服耀路女則
錦綺粲爛仲御時在船中曝所市藥雖見此輩穩坐不
揺賈公望見之深奇其節願相與語此人有心膽有似
冀缺走問船中安坐者為誰仲御不應重問徐乃答曰
會稽北海閒民夏仲御

晉中興書曰王導謂從兄敦曰王仁德未著而名位猶

輕兄威名日已振宜有以共相匡舉會三月三日中宗
出禊乘肩輦敦導並騎從紀瞻使人覘之既聞敦導騎
從乃大驚自出拜於道左中宗從容謂導曰卿吾之蕭
何也

續搜神記曰盧克獵見麋便射中之隨逐不覺遠忽見
一里門如府舍問鈴下鈴下對曰崔少府也進見少府
少府語克曰尊府君為索小女婚故相迎耳三日畢車
送克至家母問具狀以對與崔別後四年克三月三日

臨水戲遙見水傍有犢車克往開車戶見崔女與三歲男共載情意如初抱男兒還克又與金碗別

雜五行書曰欲知蠶善惡常以三月三日天陰而無日不見雨蠶大善

續齊諧記曰晉武帝問尚書郎摯虞曰三日曲水其義何指荅曰漢章帝時平原徐肇以三月初生三女至三日俱亡一村以為怪乃相攜之水濱盥洗遂因水以汎觴曲水之義起於此帝曰若如所談便非好事尚書郎

東哲曰仲治小生不足以知此臣請說其始昔周公城洛邑因流水以汎酒故逸詩曰羽觴隨波又秦昭王三日置酒河曲見有金人出奉水心劔曰令君制有西夏及秦霸諸侯乃因此處立為曲水祠二漢相緣皆為盛集帝曰善賜金五十斤左遷仲治為陽城令

詩晉張華三月三日後園會詩曰暮春元日陽氣清明祁祁甘雨膏澤流盈習習祥風啓滯導生禽鳥逸豫桑麻滋榮纖條被綠翠華含英於皇我后欽若昊乾順時

省物言觀中國讌及羣辟乃命乃延合樂華池被濯清
川汎汎龍舟沂遊渚源又上已篇曰仁風導和氣勾芒
御昊春姑洗應時月元巳啓良辰密雲蔭朝日零雨灑
微塵飛軒遊九野置酒會衆賓

晉潘尼三日洛水作詩曰晷運無窮已時逝焉可追斗
酒足為歡臨川胡獨悲暮春春服成百草敷英蕤聊為
三日遊方駕結龍旂廊廟多豪俊都邑有艷姿朱軒蔭
蘭皋翠幕映洛湄臨岸濯素手涉水褰輕衣沈鉤出比

目舉弋落雙飛羽觴乘波進素俎隨流歸

晉王濟平吳後三月三日華林園詩曰蠢爾長蛇荐食
江汜我皇神武汎舟萬里迅雷電邁弗及掩耳思樂華
林薄采其蘭皇居偉則芳園巨觀仁以山悅水為智歡
清池流爵祕樂通玄物以時序情以化宣

晉閭丘冲三月三日應詔詩曰暮春之月春服既成升
陽土潤冰渙川盈餘萌達壤嘉木敷榮后皇宣遊既宴
且寧光光華輦詵詵從臣微風扇穢朝露翳塵上蔭丹

幄下藉文茵臨川浥盟濯故潔新俯鏡清流仰睇天津
藹藹華林嚴嚴景陽葉葉峻宇奕奕飛梁垂陰倒景若
沈若翔浩浩白水汎汎龍舟皇在靈沼百辟同遊擊擢
清歌鼓枻行酬聞樂咸和具醉斯柔在昔帝虞德被遐
荒千戚在庭苗民來王今我哲后古聖齊芳惠此中國
以綏四方元首既明股肱惟良樂酒今日君子惟康
晉王讚三月三日詩曰招搖啓運寒暑代新疊疊不舍
如彼行雲猗猗季月穆穆和春皇儲降止宴及嘉賓嘉

賓伊何具惟姻族如彼葛藟衍于樛木郁郁近侍巖巖
台嶽庶寮鱗次以崇天祿如彼崑山別此琚玉巍巍天
階亦降列宿右載元首左光儲副大祚無窮天地為壽
晉陸機詩曰遲遲暮春日天氣柔且嘉元吉隆初已濯
穢遊黃河

晉阮脩上巳會詩曰三春之季歲惟嘉時靈雨既零風
以散之英華扇耀翔鳥羣嬉澄澄綠水澹澹其波脩岸
逶迤長川相遇聊且逍遙其樂如何坐此脩筵臨彼素

流嘉肴既設舉爵獻酬彈箏弄琴新聲上浮水有七德
智者所娛清瀨澆澗菱葭芬敷沈此芳鉤引彼潛魚委
飴芳美君子戒諸

晉孫綽三月三日詩曰姑洗幹運首陽穆聞嘉卉萋萋
溫風煖煖言滌長瀨聊以遊行縹萍藻流綠柳蔭坂羽
從風飄鱗隨浪轉

晉庾闡三月三日詩曰心結湘川渚目散冲霄外清泉
吐翠流綠醺漂素瀨悠想眄長川輕瀾渺如帶又三月

三日臨曲水詩曰暮春濯清汜遊鱗泳一壑高泉吐東
岑洄瀾自淨衆臨川疊曲流豐林映綠薄輕舟沈飛觴
鼓枻觀魚躍

宋顏延之三日侍遊曲阿後湖詩曰虞風載帝狩夏諺
頌王遊春方動宸駕望幸傾五州山祗蹕嶠路水若警
滄流神御出瑤軫天儀降藻舟萬軸肩行衛千翼泛飛
浮雕雲麗璇蓋祥飈被采旂江南進荆艷河徼獻趙謳
又詔宴曲水詩曰道隱未形治彰既亂帝跡懸衡皇流

共貫惟王創物永錫洪筭仁固開周義高登漢祚融世
哲葉光列聖太上正位天臨海鏡帝體麗明儀辰作貳
居彼東朝金昭玉粹德有潤身禮不僭器開榮灑澤舒
虹爍電伊思鑄飲每懷洛宴郊餞有疆君舉有禮幕帳
蘭甸畫流高陞分庭薦樂析波浮醴豫同夏諺事魚出
濟又三月三日詔宴西池詩曰河岳曜圖聖時利見於
赫有皇升中納禪載貞其恒載通其變大哉人文至矣
天睠昭哉儲德靈慶攸繁明兩紫宸景物乾元帝宗菴

藹惟城惟蕃衰衣舊職彤弓受言飾館春宮稅鑣青輅
長筵逶迤浮觴沿沂

宋謝靈運三月三日侍宴西池詩曰詳觀記牒鴻荒莫
傳降及雲鳥曰聖則天虞承唐命周襲商艱江之永矣
皇心惟眷矧乃暮春時物芳衍濫觴逶迤周流蘭殿禮
備朝容樂闋夕宴

宋謝惠連三月三日曲水集詩曰四時著平分三春稟
融爍遲遲和景婉天天園桃灼攜朋斯郊野昧旦辭鄜

郭斐雲興翠嶺芳飈起華薄解轡偃崇丘藉草繞廻壑
際渚羅時敕託波泛輕爵

齊謝朓為皇太子侍光華殿曲水宴詩曰倘求遠古迹
聽鴻名大寶曰位得一為貞朱紱叶祉綠字摘英升配
同貫進讓殊聲大橫將屬會昌已命國步中阻震居膺
慶璽劔克傳龜玉增映玄塞北靡丹徼南極浮羣駕風
非泳非涉西京藹藹東都濟濟秋祓濯流春袂浮醴初
吉云獻上除方啓昔駕陽穎今帳雲陞嘉樂舊矣芳宴

在斯載留神矚有睟天儀龍精已映威仰未移葉依黃
鳥花落春池高宴宏敞禁林稠密青墀崑起丹樓間出
翠葆隨風金戈動日惆悵清管徘徊輕佾灞漣入筵河
淇流乍渴若來往觴肴汭泝歡飲有終清光欲暮輕輶
迴首華組徐步又為人作三日侍光華殿曲水宴詩曰
神理內寂機象外融遺情汾水垂冕鴻宮樹以司牧匪
我求蒙徒勤日用誰契玄功當寧日昃求衣未明抵璧
焚翠銷劒藎城九疇式叙三辟載清麗景則春儀方在

震重聖積厚金式瓊潤祓穢河澣張樂春疇既停龍駕
亦汎鳬舟初鸞命曉朝華開夜飾陞導源迴伊流灞開
館巖敞長廊水架金觴搖蕩玉俎推移筵浮水豹席擾
雲螭歡茲廣宴穆是天儀

梁簡文帝三日侍宴林光殿曲水詩曰芳年留帝賞應
物動天襟挾苑連金陣分衢度羽林惟宮對廣掖層殿
邇高岑風旗爭曳影亭臯共生陰林花初墮蒂池荷欲
吐心又三日率爾成詩曰芳年多美色麗景復妍遙握

蘭唯是旦採艾亦今朝迴沙溜碧水曲岫散桃夭綺花
非一種風絲亂百條雲起相思觀日照飛虹橋繁華炫
姝色燕趙艷妍妖金鞍汗血馬寶髻珊瑚翹蘭馨起穀
袖蓮錦束瓊腰相看引綠樹見人還自嬌玉柱鳴羅薦
磔挽泛迴潮洛濱非拾羽滿握詎貽椒又三日侍皇太
子曲水宴詩曰震德協靈年芳節淑濯伊臨灞蕩心愉
目驤騎晨野攢金曉陸蕙氣卷旌神飈擊轂曾岑偃蹇
聳觀峯峽烟生翠幕日照綺寮銀華晨散金芝暮搖綠

水動葉丹距映條顧惟菲薄徒承恩裕藝學未優聲績

不樹豈辨河書寧摛淮賦徒偶羣龍終慙竝馭又曲水

聯句詩曰春色明上巳桃花落繞溝波迴卮不進綸下

鉤時留

臣導

絳水時迴岸花觴轉更周陳肴度玉俎垂

餌下銀鉤

王卿

迴川入帳殿列俎間芳洲漢艾凌波出

江楓拂岸游

庾肩吾

王生迴水碓蔡姬蕩輕舟岸燭斜臨

水波光上映樓

殿下

梁沈約三日侍鳳光殿曲水宴詩曰光遲蕙敏氣婉椒

臺皇心愛矣帝曰遊哉玉鸞徐驚翠鳳輕迴別殿廣臨
離宮洞啓川祗奉壽河宗相禮清洛漸筵長伊沅陞涸
盪嘉羞搖漾芳醴輕歌易繞弱舞難持素雲留管玄鶴
停絲引思為歲歲亦陽止叨服賁身身亦昌止徒勤丹
漆終愧文梓又上巳華光殿詩曰於維盛世即軒媯朝
酈宴鎬復在斯朝光灼爍映蘭池春風婉轉入細枝時
鷺顧慕聲合離輕波微動漾羽卮河宗海若生蛟螭浮
梁徑度跨迴漪朱顏始洽景將移安得壯士駐奔曦又

侍林光殿曲水宴詩曰宴鎬鏘玉鑾遊汾舉仙輶榮光
泛采旄修風動芝蓋淑氣婉登晨天行聳雲旂帳殿臨
春籞帷宮繞芳薈漸席周羽觴分墀引迴瀨穆穆寶化
昇濟濟皇階泰將御遺風軫遠侍瑤臺會又三日率爾
成篇詩曰麗日屬元巳年芳具在斯開花已匝樹流鶯
復滿枝洛陽繁華子長安輕薄兒東出千金堰西臨雁
鷺陂遊絲映空轉高楊拂地垂綠幘文照耀紫燕光陸
離清晨戲伊水薄暮宿蘭池象筵鳴寶瑟金餅汎羽卮

寧憶春蠶起日暮桑欲萎

梁劉孝綽三日侍華光殿曲水宴詩曰薰被三陽暮濯
禊元巳初皇心賸樂飲帳殿臨春渠豫遊高夏諺凱樂
盛周居復以禁林日丰茸花樹舒羽觴環階轉清澗倚
席疏妍歌已嘹亮妙舞復紆徐九成變絲竹百戲起龍
魚又三日侍宴成王曲水宴詩曰匪澤良孔殷分區屏
中縣躡跨魚流采矜唯邇封甸吾王奄鄴畢折圭承羽
傳不資魯俗移何待齊風變東山富遊士北土無遺彥

一言白璧輕片善黃金賤餘辰屬上巳清被追前訪持
此陽瀨遊復展城隅宴芳洲亘千里遠近風光扇方歡
厚德重誰言薄遊倦

梁劉孝威侍宴樂遊林光殿曲水詩曰蒸哉軒頂赫矣
堯心女媧補石重華弃金湯羅禹扇義瑟農琴皇乎備
矣受命君臨試舟五反和樂九成鈎楯祕戲協律新聲
丹盃水激絳采坏榮天吳還往海若逢迎又三日侍皇
太子宴詩曰二龍巡夏代八駿馭周朝豫遊光帝則樂

飲盛民謠皇儲遵洛禊濫觴追灞橋掌板開神禦司馬
動鑾鑣周旗交彩旄晉鼓雜清簫旌宮臨廣隰藻衛爍
巖椒蘭樽沁曲折靈若汭迴潮

梁庾肩吾三日侍蘭亭曲水宴詩曰榮星依夜動鑾駕
忽朝遊旌門臨苑樹相風生鳳樓春生露泥泥天覆雲
油油桃花舒玉澗柳葉暗金溝袂川分曲洛帳殿掩芳
洲湧躍潁魚出參差絳棗浮百戲俱臨水千鍾共逐流
北齊邢子才三日華林園公宴詩曰迴鑾自樂野弭蓋

屬瑤池五丞接光景七友樹風儀芳春時欲遽覽物惜
將移新萍已冒沼餘花尚滿枝草滋徑蕪沒林長山蔽
虧方筵羅玉俎激水漾金卮歌聲斷且續舞袖合還離
隋盧思道上已禊飲詩曰山泉好風景城市厭囂塵聊
持一罇酒共尋千里春餘光下幽桂夕吹舞青蘋何言
出關後重有入林人

賦後漢杜篤板襪賦曰王侯公主暨乎富商用事伊維
帷慢玄黃於是旨酒嘉肴方丈盈前浮棗絳水酌酒醲

川若乃窈窕淑女美媵艷姝戴翡翠珥明珠曳離桂立
水涯微風掩塤纖穀低徊蘭蕙彤嚙感動情魂若乃隱
逸未用鴻生俊儒冠高冕曳長裾坐沙渚談詩書詠伊
呂歌唐虞

晉成公綏洛襖賦曰考古日簡良辰祓除解襖司會洛
濱妖童媛女嬉游河曲或振纖手或濯素足臨清流坐
沙塲列壘樽飛羽觴

晉張協洛襖賦曰夫何三春之令月嘉天氣之氤氲和

風穆以布暢百卉曄而敷芬川流清冷以汪濊原隰蔥
翠以龍鱗游魚攬滄於淥波玄鳥鼓翼於高雲美節慶
之動物悅羣生之樂欣故新服之既成將袞除於水濱
於是縉紳先生嘯儔命友攜朋接黨冠童八九主希孔
墨賓慕顏柳臨崖詠吟濯足揮手乃至都人士女奕奕
祁祁車駕岬岵充溢中逵粉葩翕習緣阿被湄振袖生
風接袵成幃若夫權戚之家豪侈之族采騎齊鑣華輪
方轂青蓋雲浮參差相属集乎長洲之浦曜乎洛川之

曲遂乃停輿蕙渚稅駕蘭田朱幔虹舒翠幕蜺連羅樽
列爵周以長筵於是布椒醕薦柔嘉祈休吉蠲百病漱
清源以滌穢兮攬綠藻之纖柯浮素妝以蔽水灑玄醪
於中河

晉褚奕襖賦曰伊暮春之令月將解襖於通川凌元已
之清晨邈微風之冷然川迴瀾以澄映嶺挿崿以霏烟
輕霞舒於翠崖白雲映乎青天

晉夏侯湛襖賦曰羨暮春之嘉辰美靈氣之和柔結方

軌之奏路數令節而宣遊爾乃鈴鳴擢翠旗垂繁纓微
雲乘軒清風卷旌飛輪焱起良馬電驚車駕鱗萃男女
霧會服煥羅縠翠翳連蓋榮香丸於素襟結九齡乎時
外粲爛虺韡混曄發越若乎朝春挺葩夕霞抱月爾乃
臨清流背綠柯雲幕高接丹組四羅

晉阮瞻上巳會賦曰臨清川而嘉讌聊假日以遊娛陰
朝雲而為蓋託茂樹以為廬好脩林之翳鬱樂草莽之
扶疎列四筵而設席祈吉祥於斯塗酌羽觴而交酬獻

遐壽之無疆同歡情而悅豫欣斯樂之愷慷發中懷而
弦歌託情志於官商

梁蕭子範家園三日賦曰春亦暮止田家上巳時將礫
於九門節方郊於七里扇習習之和風照遲遲之華晷
飛玄翮之土燕奪丹胸之山雉聊結新而濯故式東流
之前軌居免上漏樹非榛栗既無擇於爽塏曾不訪於
凶吉右瞻則青溪千仞北覩則龍盤秀出與歲月而荒
茫同林藪之蕪密惟茲嘉月悅此時良庭散花藥傷挿

筠篁灑玄醪於沼沚浮絳棗於泱泱觀翠綸之出沒戲
青舸之低昂

周庾信三月三日華林園馬射賦曰于時玄鳥司曆蒼
龍馭行焦獻水開桐華萍合皇帝幸於華林之園千乘
雷動萬騎雲屯落花與芝蓋同飛楊柳共春旗一色乃
命羣臣陳大射之禮騶虞九節狸首七章於是選朱汗
之馬校黃金之埒紅陽飛鵲紫燕陸沈唐成公之驕驕
海西侯之千里莫不飲羽銜竿吟猿落雁鐘鼓振地埃

塵漲天綵則錦市俱移錢則銅山合徙實天下之至樂
景福之歡欣者也歲次昭陽月在大梁其日上巳其時
少陽春吏司職青祇効祥徵萬騎於平樂開千門於建
章皇帝翊四校於仙園廻六龍於天苑華蓋平飛風烏
細轉帷宮宿設帳殿開筵傷臨細柳斜界宜春河濬薤
草渭口澆泉棚雲五色的暈重圓陽管既調春絃實撫
玉律調鐘金鐸節鼓於是咀銜拉鐵逐日追風竝試長
楸之埒俱下蘭池之宮鳴鞭則汗赭入埒則塵紅變三

驅而畫鹿登百尺而懸熊禮正六耦詩歌九節弓如明
月對棚馬似浮雲向埒雁失羣而行斷猿求林而路絕
乃有六郡雄才五陵高選新迴馬邑之兵始罷龍城之
戰尚帶流星猶乘奔電始聽鼓而唱籌即移卒而標箭
熊耳刻杯浮雲畫壘水衡之錢山積織室之錦霞開司
筵賞至酒正杯來既而日下澤宮筵闌相圃悵從蹕之
留歡眷迴鑾之餘武

序晉王羲之三日蘭亭詩序曰永和九年歲在癸丑暮

春之初會於會稽山陰之蘭亭修楔事也羣賢畢至少長咸
集此地有崇山峻嶺茂林修竹又有清流激湍映帶三
右引以為流觴曲水列坐其次雖無絲竹管絃之盛一
觴一詠亦足以暢叙幽情是日也天朗氣清惠風和暢
仰觀宇宙之大俯察品類之盛所以遊目騁懷足以極
視聽之娛信可樂也

晉孫綽三日蘭亭詩序曰古人以水喻性有旨哉斯談
非以停之則清混之則濁耶情因所習而遷移物觸所

遇而興感故振轡於朝市則克屈之心生閒步於林野
則遼落之志興仰瞻羲唐邈已遠矣近詠臺尚顧深增
懷為復於曖昧之中思縈拂之道屢借山水以化其鬱
結永一日之足當百年之溢以暮春之始楔于南澗之
濱高嶺千尋長湖萬頃隆屈澄汪之勢可為壯矣乃席
芳草鏡清流覽卉木觀魚鳥具物同榮資生成暢於是
和以醇醪齊以達觀決然兀矣焉復覺鵬鷖之二物哉
宋顏延之三日曲水詩序曰夫方策既載皇王之跡已

殊鐘石畢陳舞詠之情不一雖淵流遂往詳略異聞然
其宅天衷立民極莫不崇尚其道神明其位拓世貽統
固萬葉而為量者也有宋函夏帝圖宏遠高祖以聖武
定鼎規同造物皇上以睿文承厯景屬宸居隆周之卜
既永宗漢之兆在焉正體毓德於少陽上宰宣哲於元
輔晷緯昭應山瀆效靈五方雜遝四隩來暨頤望素羣
并柯共穗之瑞史不絕書棧山航海逾沙軼漠之貢府
無虛月日躔胃維月軌青陸皇祇發生之始后王布和

之辰思對上靈之心以惠庶萌之願加以二王于邁出
餞戒吉有詔掌故爰命司厯獻陳洛飲之禮具上巳之
儀南除輦道北清禁林左闕巖陞右梁潮源略亭臯跨
芝壥苑太液懷曾山松石峻崦葱翠陰烟游泳之所攢
萃翔驟之所往還閔水環階引池分席春官聯事蒼靈
奉塗然後升祕駕肩提騎撫玉鑾發流吹以降于所行
禮也龍文飾轡青翰侍御華裔殷至觀聽驚集揚袂風
山舉袖陰澤靚粧藻野袷服縵川故以隱眼外區煥衍

都內者矣上膺萬壽下禔百福布筵稟和闔堂依德情
盤景遽歡洽日斜悵釣臺之未臨慨鄴宮之不懸方且
排鳳闕以高遊開爵園而廣宴並命在位展詩發志則
夫誦美有章陳信無愧者歟

齊王融三日曲水詩序曰臣聞出豫為象釣天之樂張
焉時乘既位御氣之駕翔焉是以得一奉宸逍遙襄城
之域體元則大悵望姑射之阿然宵眇寂寥其獨適者
也至如夏后兩龍載驅璿臺之上穆王八駿如舞瑤水

之陰亦有饗云固不與萬民共也我大齊之握機創厯
誕命建家接禮貳宮考庸太室昭華之珍既徙延喜之
玉攸歸草宋受天保生萬國度邑靜鹿丘之數遷鼎息
大垌之慙駿發開其遠祥定爾固其洪業皇帝體膺上
聖運鍾下武冠五行之秀氣邁三代之英風昭章雲漢
暉麗日月猶且旦明廢寢晷晷忘殮懼負重於春冰懷
御奔於秋駕儲后睿哲在躬妙善居質內積和順外發
英華斧藻至德琢磨令範若夫族茂麟趾宗固磐石跨

踞昌姬韜軼炎漢元宰比肩於尚父中鉉繼踵乎周南
分陝流勿剪之歡來仕允克施之譽本枝之盛如此稽
古之政如彼故免羣生於湯火納百姓於休和引鏡皆
明目臨池無洗耳沈冥之怨既缺邁軸之疾已銷讒莠
茂聞攘爭拚息稀鳴桴于砥路鞠茂草于園扉侮食來
王左言入侍一尉候於西東合車書於南北偃草解軒
銷金罷刃天瑞降地符升澤馬來器車出江海呈象龜
龍載文功既成矣世既貞矣信可以優游暇豫作樂崇

德者歟于時青鳥司開條風發歲粵斯上巳惟暮之春
禊飲之日在茲風舞之情咸蕩載懷平圃乃睠芳林芳
林園者福地奧區之湊丹陵若水之舊殷殷均乎姚澤
撫撫尚於周原飛觀神行虛簷雲構離房乍設層樓間
起負朝陽而抗殿跨靈沼而浮榮鏡文虹於綺疏浸蘭
泉於玉砌幽幽叢薄秩秩斯干新萍泛止華桐發岫雜
天采於桑萸亂嚶聲於錦羽禁軒承幸清宮侍宴綬帷
宿置帝幕宵懸既而滅宿登霞澄光辨色徐鑾警節鳴

鐘暢音七萃連鑣九旂齊軌爾乃迴輿駐蹕岳鎮川渟
睟容有穆賓儀式序授几肆筵因流波而成次蒨肴芳
醴任激水而推移葆脩陳階金匏在席戚奏翹舞簫動
邠詩召鳴鳥于嶠山追伶倫於嶰谷清歌有闋羽觴無
算上陳景福之賜下獻南山之壽信凱宴於在藻知和
樂於食苹

梁簡文帝三日曲水詩序曰竊以周城洛邑自流水以
袞除晉集華林同文軌而高宴莫不禮具義舉咨矩重

規昭動神明雍熙鍾石者也皇太子生知上德英明在躬智湛靈珠辨均河注騰茂實於三善振嘉聲於八區是節也上巳屬辰餘萌達壤倉庚應律女夷司候爾乃分階樹羽疏泉泛爵蘭觴泂沂蕙肴來往賓儀式序盛德有容吹發孫枝聲流嶰谷舞艷七盤歌新六變遊雲駐綵仙鶴來儀都人野老雲集霧會結軫方衢飛軒照日

五月五日

琴操曰介子綏割其腓股以餌重耳重耳復國子綏獨無所得綏甚怨恨乃作龍蛇之歌以感之終匿於山文公令燔山求之子綏遂抱木而燒死文公令民五月五日不得發火

國語云
介子推

續漢禮儀志曰五月五日朱索五色柳桃印為門戶飾以止惡氣

風土記曰仲夏端五烹鶩角黍端始也謂五月初五日也又以菰葉裹粘米煮熟謂之角黍

續齊諧記曰屈原五月五日投汨羅而死楚人哀之每至此日竹筒貯米投水祭之漢建武中長沙歐回白日忽見一人自稱三閭大夫謂曰君當見祭甚善但常所遺苦蛟龍所竊今若有惠可以楝樹葉塞其上以五采絲縛之此二物蛟龍所憚也回依其言世人作粽并帶五色絲及楝葉皆汨羅之遺風也

崔實四民月令曰五月五日取蟾蜍可合惡疽瘡取東行螻蛄治婦難產

會稽典錄曰女子曹娥者會稽上虞人父能絃歌漢安
帝二年五月五日於縣江泝濤迎波神溺死不得尸骸
娥年十四乃緣江號哭晝夜不絕聲七日遂投江而死
抱朴子蟾蜍萬歲者頭上有角頷下有丹書八字再重
五月五日午時取之陰乾百日以其足畫地即為流水
又曰或問辟五兵之道荅曰以五月五日作赤靈符著
心前

風俗通曰五月五日以五綵絲繫臂者辟兵及鬼令人

不病溫亦因屈原又曰五月五日續命縷俗說以益人命

夏小正月此日蓄採衆藥以蠲除毒氣

荆楚記曰荆楚人以五月五日並蹋百草採艾以為人懸門戶上以攘毒氣又曰屈原以是日死故並將舟楫以拯之今日競渡是其遺跡

大戴禮曰五月五日蓄蘭為沐浴

楚辭曰浴蘭湯兮沐芳華

詩梁王筠五日望採拾詩曰長絲表良節金縷應嘉辰
結蘆同楚客採艾異詩人折花競鮮彩拭露染芳津含
嬌起斜眄歛笑動微嚬獻璫依洛浦懷佩似江濱

七月七日

列仙傳曰陶安公者六安鑄冶師行火者朱雀止冶上

曰安公安公冶與天通七月七日迎汝以赤龍

事具仙部

又曰王

子喬見桓良曰告我家七月七日待我於緱氏山頭至
時乘白鶴在山頭望之不得到舉手謝時人數日而去

漢書曰武帝七月七日生於猗蘭殿

漢武故事曰七月七日上於承華殿齋正中忽有一青鳥從西方來集殿前上問東方朔朔曰此西王母欲來也有頃王母至

事具
鳥部

崔實四民月令七月七日曝經書設酒脯時果散香粉於庭上祈請於河鼓織女言此二星神當會守夜者咸懷私願或云見天漢中有奕奕正白氣如地河之波輝輝有光曜五色以此為徵應見者便拜乞願三年乃得

竹林七賢論曰阮咸字仲容籍兄子也諸阮前世皆儒
學內足於財唯藉一生尚道棄事好酒而貧舊俗七月
七日法當曬衣諸阮庭中爛然莫非綈錦咸時總角乃
豎長竿標大布犢鼻於庭中曰未能免俗聊復爾耳
世說曰郝隆七月七日見鄰人皆曝曬衣物隆乃仰臥
出腹云晒書

續齊諧記曰桂陽城武丁有仙道謂其弟曰七月七日
織女當渡河諸仙悉還宮弟問曰織女何事渡河荅曰

織女暫詣牽牛世人至今云織女嫁牽牛也

詩古詩曰迢迢牽牛星皎皎河漢女纖纖濯素手札札弄機杼終日不成章涕泣零如雨河漢清且淺相去詎幾許盈盈一水間脉脉不得語

晉潘尼七月七日侍皇太子宴玄圃園詩曰商風初授辰火微流朱明送夏少昊迎秋嘉木茂園芳草被疇於時我后以豫以遊

晉李充七月七日詩曰朗月垂玄景洪漢截皓倉牽牛

難牽牧織女守空裏河廣尚可越怨此漢無梁

晉蘓彦七月七日詠織女詩曰織女思北止牽牛歎南陽時來嘉慶集整駕巾玉箱瓊珮垂藻蕤霧裾結雲裳釋轡紱微庭解衿碧琳堂歡宴未及究晨暉照扶桑悵悵一宵促遲遲別日長

宋孝武七夕詩曰白日傾晚照絃月升初光炫炫葉露滿肅肅庭風揚瞻言媚天漢幽期濟河梁服箱從奔輶紈綺闕成章解帶遽迴軫誰云秋夜長愛聚雙情款念

離兩心傷

宋南平王劉鑠七夕詠牛女詩曰秋動清風扇火移炎
氣歇廣簷含夜陰高軒通夕月安步巡芳林傾望極雲
闕組幕縈漢陳龍駕凌霄發誰云長河遙頗覺促筵悅
沉情未申寫飛光已飄忽來對眇難期今歡自茲沒

宋謝惠連七夕詠牛女詩曰落日隱簷楹升月照簾櫳
團團滿葉露淅淅振條風蹠足循廣除瞬目矚曾穹雲
漢有靈匹彌年闕相從遐川阻昵愛脩渚曠清容弄杼

不成藻簪轡驚前蹤昔離秋已兩今聚夕無雙傾河易
迴幹款顏難久悵沃若靈駕旋寂寥雲幄空留情顧華
寢遙心逐奔龍

宋王僧達七夕月下詩曰遠山歛氛祲廣庭揚月波氣
往風集隙秋還露泣柯節氣既已屢中宵振綺羅來歡
詎終夕收淚泣分河

宋顏延之為織女贈牽牛詩曰婺女儷經星姮娥棲飛
月慙無二媛靈託身侍天闕閭闔殊未暉咸池豈沐髮

漢陰不夕張長河為誰越雖有促宴期方須涼風發

宋謝靈運七夕詠牛女詩曰火逝首秋節明經弦月夕
月弦光照戶秋首風入隙陵風步曾岑憑雲肆遙脉徙
倚西北庭竦踴東南覲紈綺無報章河漢有駁軌

宋謝莊七夕夜詠牛女應制詩曰輟機起春暮停箱動
秋杵璇居照漢右芝駕肅河陰容裔泛星道逶迤濟烟
渚陸離迎宵佩修爍望昏簪俱傾環氣怨共歇決年心
珠殿釭未沫瑤庭露已深夕清豈掩拂絃輝無久臨

梁武帝七夕詩曰白露月下圓秋風枝上鮮瑤臺含碧
霧羅幕生紫烟妙會非綺節佳期乃涼年玉壺承夜急
蘭膏依曉煎昔悲漢難越今傷河易旋怨咽雙念斷悽
悼兩情懸

梁簡文帝七夕穿針詩曰憐從帳裏出相見夜窓開針
歇疑月暗縷散恨風來

梁柳惲七夕穿針詩曰代馬秋不歸緇紉無復緒迎寒
理夜縫映月抽纖縷清露下羅衣秋風吹玉柱流景對

秋夕餘光欲難駐

梁劉遵七夕穿針詩曰步月如有意情來不自禁向光
抽一縷舉袖弄雙針

梁劉孝威七夕穿針詩曰縷亂恐風來衫輕羞指現故
穿雙眼針時縫合歡扇

梁沈約織女贈牽牛詩曰紅粧與明鏡二物本相親用
持施點畫不照離居人往秋雖一照一照還復塵塵生
不復拂蓬首對河津冬夜寒如是寧遽道陽春初商忽

云至暫得奉衣巾施衿誠已故每聚忽如新

梁王筠代牽牛荅織女詩曰新知與生別由來儻相值
如何寸心中一宵懷兩事歡娛未繾綣倏忽成離異終
日遙相望祇益生愁思猶憶今春悲尚有故年淚忽遇
長河轉獨喜涼颼至奔情翊鳳軫精阿警龍轡

梁范雲望織女詩曰盈盈一水邊夜夜空自憐不辭精
衛苦河流未可填寸情百重結一心萬處懸願作雙青
鳥共舒明鏡前

梁劉孝威詠織女詩曰金鈿已照耀白日未蹉跎欲待
黃昏至含嬌渡淺河

梁何遜七夕詩曰仙車駐七驤鳳駕出天潢月映九微
火風吹百和香來歡暫巧笑還淚已啼粧別離不得語
河漢漸湯湯

梁庾肩吾七夕詩曰玉匣卷懸衣高樓開夜扉姮娥隨
月落織女逐星移離前忿促夜別後對空機倩語雕陵
鵲填河未可飛又奉使江州船中七夕詩曰九江逢七

夕初弦值早秋天河來映水織女欲攀舟漢使俱為客
星槎共逐流莫言相送浦不及穿針樓

北齊邢子才七夕詩曰盈盈河水側朝朝長歎息不悵
漸哀苦波流詎可測秋期忽云至停梭理容色束衿未
解帶迴鑾已霑軾不見眼中人誰堪機上織願逐青鳥
去暫因希羽翼

陳江總七夕詩曰漢曲天榆冷河邊月桂秋婉孌期今
夜飄飄渡淺流輪隨月宿轉路逐綵雲浮橫波翻瀉淚

東素反絨愁此時機杼息獨向紅粧羞

杜審言七夕詩曰白露含明月青雲斷絳河天街七裏
轉關道二神過襦服銷環珮香筵拂綺羅年年今夜盡
機杼別情多

隋王春七夕詩曰天河橫欲曉鳳駕儼應飛落月移粧
鏡浮雲動別衣懽逐今宵盡愁隨還路歸猶將宿昔淚
更上去年機

隋張文恭七夕詩曰鳳律驚秋氣龍梭靜夜機星橋百

枝動雲路七香飛映月回雕扇凌霞曳綺衣含情向華
幄流態入重闌懽餘夕漏盡怨結曉驂歸誰念分河漢
還憶兩心違

賦隋庾信七夕賦曰兔月先上羊燈次安覩牛星之曜
景視織女之闌干於是秦娥麗妾趙豔佳人窈窕名燕
逶迤姓秦嫌朝粧之半故憐晚拭之全新此時併捨房
櫳共往庭中縷條繁而貫矩針鼻細而穿中

南齊謝朓七夕賦曰金祇司矩火曜方流素鍾當御夷

則鳴秋朱光既夕涼雲始浮盈多靈之藹藹升夜月之
悠悠步廣庭而延膝屬天媛而淹留嗟斯靈之淑景招
好仇於服箱壓白玉而為飾霏丹霞而為裳迴龍駕之
容裔亂鳳管之淒鏘軾帝車而捐玦凌天津而上翔悵
漢渚之夕漲欣河廣之既梁臨瑤席而宴語綿含睇而
蛾揚嗟蘭夜而難永泣會促而怨長撫鳴琴而修浩浣
安歌而自傷歌曰月殿清兮桂醪酬雲幄靜兮香風浮
龍鑣蹠兮玉鑾整睠星河兮不可留

七月十五

荆楚歲時記曰七月十五日僧尼道俗悉營盆供諸寺院

孟蘭盆經云有七葉功德並幡花歌鼓果食送之蓋由此又曰目連比丘見其亡母生餓鬼中即以鉢盛飯往餉其母食米入口化成火炭遂不得食目連大叫馳還白佛佛言汝母罪重非汝一人力所奈何當須十方僧衆威神之力至七月十五日當為七代父母現在父母

厄難中者具百味五果以著盆中供養十方大德佛敕
衆僧皆為施主咒願七代父母行禪定意然後受食是
時目連母得脫一劫餓鬼之苦目連白佛未來世佛第
子行孝順者亦應奉盂蘭盆為爾可否佛言大善故後
代人因此廣為華飾乃至刻木割竹飴蠟翦絲模花果
之形極工妙之巧

道經曰七月十五中元之日地官校勾搜選人間分別
善惡諸天聖衆普詣宮中簡定劫數人鬼傳錄餓鬼因

徒一時皆集以其日作立都大獻於玉京山採諸花果
珍奇異物幢幡寶蓋清膳飲食獻諸聖衆道士於其日
夜講誦是經十方大聖齊誦靈篇囚徒餓鬼俱飽滿免
於衆苦得還人中

賦楊炯孟蘭盆賦曰渾元告秋義和奏曉太陰望兮圓
魄皎閭闔開兮涼風嫋四海澄兮百川晶陰陽肅兮天
地宵掃離宮清重閣設皇邸張翠幕鸞飛鳳翔睽陽修
爍雲舒霞布翕赫冥霍陳法供飾孟蘭壯神功之妙物

何造化之多端青蓮吐而非夏頰果搖而不寒銅鐵鉛
錫瑇琅玕映以甘泉之玉樹冠以承露之金盤憲章
三極儀刑萬類上寥廓兮法天下安貞兮相地殫怪力
窮神異少君王子掣曳兮若東玉女瑤姬翩僊兮不至
鳴鵲鷦與鶯鶯舞鸛雞與翡翠毒龍怒兮赫然狂象奔
兮沈醉怖魍魎潛魑魅離婁明目不足見其精微匠石
洗心不足徵其奧秘夫其遠也天台嶮起繞之以赤霞
夫其近也削成孤峙覆之以蓮花晃兮瑤臺之帝室挹

兮金闕之仙家其高也上諸天於大梵其廣也遍諸法
於恒沙上可以薦元府於七廟下可以納羣動於三車

九月九日

風土記曰九月九日律中無射而數九俗尚此月折茱
萸房以挿頭言辟除惡氣而禦初寒

續晉陽秋曰陶潛嘗九月九日無酒宅邊菊叢中摘菊
盈把坐其側久望見白衣至乃王弘送酒也即便就酌
醉而後歸

續齊諧記曰汝南桓景隨費長房遊學累年長房謂之
曰九月九日汝家當有灾厄急宜去令家人各作絳囊
盛茱萸以繫臂登高飲菊酒此禍可消景如言舉家登
山夕還家見雞狗牛羊一時暴死長房聞之曰代之矣
今世人每至九日登山飲菊酒婦人帶茱萸囊是也
孟嘉傳曰嘉為桓溫叅軍既和而正溫甚重之九月九
日溫遊龍山參僚畢集時佐吏竝著戎服有風至吹嘉
帽落溫謂左右及賓客勿言以觀其舉止

臨海記曰郡北四十步有湖山山甚平正可容數百人
坐民俗極重每九日菊酒之辰讌會於此山者常至三
四百人

詩宋謝瞻九日從宋公戲馬臺詩曰風至授寒服霜降
休百工巢幕無留燕遵渚有來鴻輕霞冠秋日迅商薄
清穹聖心眷嘉節鳴鑾戾行宮四筵霑芳醴中堂起絲
桐扶光迫西汜歡餘宴有窮

宋謝靈運九日從宋公戲馬臺送孔令詩曰季秋朔邊

苦旅雁違霜雪淒淒陽卉腓皎皎寒潭潔良辰感聖心
雲旗興暮節鳴葭戾朱宮蘭卮獻時哲歸客逐海隅脫
冠謝朝列河流有急澗浮驂無緩轍

齊竟陵王蕭子良九日侍宴詩曰月殿風轉層臺氣寒
高雲斂色遙露已團式詔司警言戾秋繼輕觴時薦落
英可食

齊王儉侍皇太子九日玄圃宴詩曰明明儲后沖默其
量徘徊禮樂優遊風尚微言外融幾神內王就日齊暉

儀雲等望本茂條榮源澄流潔漢稱間平周云魯衛咨
我藩華方軌前軼秋日在房鴻雁來翔寥寥清景靄靄
微霜草木搖落幽蘭獨芳眷言溜苑尚想濠梁既暢旨
酒亦飽徽猷有來斯悅無遠不柔

梁簡文帝九日侍皇太子樂遊苑詩曰離光麗景神英
春裕副極儀天金鏘玉度監撫昭明善物宣布惠潤崑
瓊澤熙垂露秋晨精曜駕動宮闈露點金節霜沉玉機
玄戈側影翠羽翻暉庭迴鶴蓋水照犀衣蘭羞薦俎竹

酒澄芬千音寫鳳百戲承雲紫燕躍武赤兔越空橫飛
鳥箭半轉地弓又九日賦韻詩曰是節協陽數高秋氣
已精簷芝逐月啓惟風依夜清遠燭承歌黛斜橋聞履
聲梁塵下未息共愛賞心并

梁沈約為臨川王九日侍太子宴詩曰涼風北起高雁
南翻葉浮楚水草折梁園淒清霜野惆悵晨鷗雲輕寒
樹日麗秋源三金廣設六羽高陳寒英始獻涼酎初醇
靡靡神襟鏘鏘羣彥思媚儲猷洽和奉宴思暢蘭席歡

同桂殿景遽樂推臨風以眷麗景天枝位非德舉任伍
辰階祚均河楚負岳未勝瞻雲難侶望古興惕心焉載
佇又九日侍宴樂遊苑詩曰憑玉宅海端宸御天上流
飛壑靜震騰川凝神貫極搞道漏泉西裘委袵南風在
弦暮芝始綠年桂初丹上林葉下滄池水寒霜霑玉樹
雁動輕瀾停蹕玉陛徙衛璇墀瑀箱鳳綵羽蓋鸞姿虹
旌迢遰翠華歲蕤禮宏灞汭義高洛湄

梁丘遲九日侍宴樂遊苑詩曰朱明已謝萼收司禮爰

理秋被備揚旌祭奉璋我我金貂濟濟上林宏敞離宮
非一綵殿迴風丹樓映日隋珠甲帳屯衛周悉晬容徐
動天儀澄謐雲物游颺光景高麗枯葉未落寒花委砌
絲桐激舞楚雅閒慧參差繁響殷勤流詣

梁任昉九日侍宴樂遊苑詩曰帝德峻韶夏王功書頌
平共貫汾五勝獨道邁三英我皇撫歸運時乘信告成
一唱華鍾石再撫被絲笙黃草歸雒木梯山薦玉榮時
來濁河變瑞起溫洛清物色動宸眷民豫降皇情

梁劉苞九日侍宴樂遊苑正陽堂詩曰六郡良家子幽
并遊俠兒立乘爭飲羽倒騎競紛馳鳴珂飾華旄金鞍
映玉羈膳羞殫海陸和齊眊秋宜雲飛雅琴奏風起洞
簫吹曲終高宴罷景落樹陰移微薄承嘉惠飲德良不
貲取効績無紀感恩心自知

梁王脩己九日詩曰霜威始落翠寒氣初入堂隋珠爛
似燭懸藜疑夜光舞步因絃折歌聲隨袂揚夜深聞漏
緩簷虛覺唱長

梁劉孝威九日酌菊花酒詩曰露花疑始摘羅衣似適
熏餘杯度不取欲持嬌使君

梁何遜為西豐侯九日侍宴樂遊苑詩曰皇德無與讓
重規襲帝勛垂衣化比屋卷領慎為君翺飛悅有道卉
木荷平分宸襟動時豫歲序屬涼氛城霞旦晃朗槐霧
曉氤氲鸞和馳八襲鳳駕啓千羣羽觴歌湛露佾舞奏
承雲禁林終宴晚華池物色曛疎樹翻高葉寒流聚細
文

梁庾肩吾侍讌九日詩曰轍迹光周頌巡遊減夏功鉤
陳萬騎轉閭闔九門通秋暉逐行漏朔氣繞相風獻壽
重陽節迴鸞上苑中疏山開輦道間樹出離宮玉醴吹
花菊銀床落井桐飲羽山西射浮雲冀北驄塵飛金埒
滿葉破柳條空

周王褒九日從駕詩曰黃山獵地廣青門官路長律改
三秋節氣應九鍾霜曙影初分地暗色始成光交旆長
秋坂緹幕杏間堂射馬垂雙帶豐貂珮兩璜苑寒梨樹

紫山秋菊葉黃終慙屬車對空假侍中郎

賦宋傅亮九月九日登陵囂館賦曰歲九旻之暮月肅
晨駕而北逝度迴壑以停轅凌孤館而遠憩何物慘而
節哀又雲悠而風厲悴綠繁於寒渚隕豐灌於荒蒞玩
中原之芬菊惜蘭圃之彫蕙旌竹栢之勁心謝梧楸之
零脆爾乃流眄平隰落日還臯于感具盈在物周騷聆
離鷗之悽響泝鳴林之瀏飈彼遊子之苦傷每寤歎於
我勞矧集悲而鍾苦疚寸心其如忉眇天末以遙瞪怨

故鄉之阻遼

書魏文帝與鍾繇書曰歲往月來忽復九月九日九為陽數而日月並應俗嘉其名以為宜於長久故以享宴高會是月律中無射言羣木庶草無有射而生至於芳菊紛然獨榮非夫含乾坤之純和體芬芳之淑氣孰能如此故屈平悲冉冉之將老思食秋菊之落英輔體延年莫斯之貴謹奉一束以助彭祖之術

藝文類聚卷四